

Moutier e sia regiun ussa

Discussiuns cun autoritads ils 16 d'avust

DA GUIU SOBIELA-CAANITZ

■ **Ils 18 da zercladur ha la populaziun da Moutier (7690 olmas) giavischà da sa separar dal chantun Berna e da far part dal chantun Giura. Perquai dastgan era Belprahon/BE e Sorvilier/BE, duas vischnancas francofonas da la regiun (respectivamain 308 e 280 olmas), vuschar ils 17 da settember davart lur eventuala integraziun en il chantun Giura.** Belprahon è limitrof da Moutier encunter ost, Sorvilier è situà a sidvest, davos la chavorgia da Court, en la vallada auta da la Birse. Domadus scrutinis èn dentant colliads cun in problem.

Duas vischnancas duain decider

Ils 8 d'avust ha la «Tribune de Genève» publictà in artitgel intitulà: «Après Moutier, Belprahon veut rejoindre le Jura». Il titel è surfatg: I sa tracta mo dal comité «Belprahon dit oui» (al Giura) da var quindesch persunas che na fan betg part dal cussegl communal. Lur argument principal è ch'i na dess nagin senn da separar Belprahon da Moutier cun in cun-

fin chantunal suenter in'unioni da settschientaners. «Il cussegl communal ha envidà la populaziun ad ina sesida d'infurmaziun ils 16 d'avust davart la relevanza da la votaziun dals 17 da settember. A las 18.00 respundan represchentanants da la regenza bernaisa las dumondas. A las 20.00 vegn ina delegaziun da la regenza giurassiana.» Era Sorvilier vegn a beneventar talas visitas. Già ils 13 da fanadur ha la regenza giurassiana confermà ch'ella saja pronta d'integrar Belprahon e Sorvilier.

Dudesch recurs cunter la votaziun da zercladur

Ma il prefect dal Giura bernais n'ha anc betg tractà ils dudesch (!) recurs da var 42 aderents da Berna cunter la votaziun dals 18 da zercladur. È el surdumandà, sco funzionari bernais, da l'incumbensa da decider sez en chausa? Quai dumonda schefredactor Pierre-André Comte en ses editorial («Le Jura Libre», 11 d'avust 2017, p. 1): «Tuts supponan ch'il prefect saja suttamess a pressiuns e ch'inquala decisiun ch'el piglia vegnia a manar ad el

reproschas.» I po pia succeder che Belprahon e Sorvilier vuschian ils 17 da settember senza savair sche Moutier astgia propi vegnir ina citad dal chantun Giura u sch'ins duaja repeter la votaziun dals 18 da zercladur. Ils 21 da fanadur ha Irma Hirschi, deputada da Moutier en il cussegl grond bernais, «supplitgà la regenza, tras in'interpellaziun urgenta, da spustar il scrutini en domaduas vischnancas fin ch'ins enconuschia l'appartegnientscha legala da Moutier» («Le Jura Libre», 11 d'avust 2017, p. 2). Ils 5 d'avust ha il comité «Belprahon dit oui» scrit al prefect per criticar il fatg ch'ils recurs na sajan anc betg tractads. La «Tribune de Genève» dals 19 da fanadur ha publictà ina survista dals recurs: «Var 32 persunas domiciliadas a Moutier han pretais ch'ins annulleschia la votaziun dals 18 da zercladur*». Questa situaziun prolunghescha la malsegirezza areguard il status da trais vischnancas ussa bernaisas. Co va quai vinavant?

* <https://www.tdg.ch/suisse/suisse-romande-prevotois-demandent-annulation-vote/story/17536569>